

Aruba Way Foundation:

Ta duna donacion na Huize Maris Stella y Oral Health Foundation Aruba



SAN NICOLAS – Tin hopi fundacion na Aruba cu ta traha duro pa bin cu proyectonan nobo na bienestar di nan clientenan. Hopi biaha e fundacion tin e idea y e perseverancia pa sigui dilanti cu e proyecto pero ta haci falta e fondonan necesario pa logra un exito. Aki nan ta unda Aruba Way Foundation ta yuda!

Aruba Way Foundation ta un fundacion cu ta yuda otro fundacionnan riba nos isla cu e parti financiero di un proyecto. Despues di evalua cada proyecto cu drenta Aruba Way Foundation ta wak unda mas por yuda y e biaha

aki a dicidi pa yuda dos fundacion cu proyecto nan importante pa nos comunidad.

E prome fundacion cu a ricibi un donacion ta SABA – Huize Maris Stella. Na Huize Maris Stella e team dinamico di cuida ta trahando un parke di recreacion caminda nos hende grandi por cana, sinta y pasa un rato ameno. Considerando cu un cantidad grandi di e clientenan di e centro ta cana cu poco dificultad mester pone railing full rond di e parke y mester traha un cura pa asina nos hende grandi por ta sigur. E suma di 18.750 florin lo cubri e gastonan di e railing y tambe pa traha e cura. E director nobo di SABA,



Sr. Remo Kock y e lider di e proyecto sra. Marita Tjou Tam Sin a keda masha contento cu e donacion y ya caba Sra. Marita a cuminsa cu ehecuccion di e proyecto! Oral Health Foundation Aruba, un fundacion relativamente hoben, ta e di dos fundacion cu a ricibi e suma di 10 mil florin pa compra

materialnan necesario pa haci e Build A Smile proyecto un exito. Nos mucha nan mester wordo informa y educa tocante e manera adecua pa cuida nan djente. E fundacion aki ta bishita nos scolnan primario pa asina educa e muchanan y como parti di e proyecto y danki na e donacion di Aruba Way Founda-

tion y otro socionan cada mucha lo ricibi nan skeiro di djente cu e proteccion pa tene nan skeiro limpi.

Aruba Way Foundation ta contento di por yuda Huize Maris Stella y Oral Health Foundation Aruba cu dos proyecto asina importante y ta desea nan hopi exito! □